



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

35. Kalenderwoche – ab 30. August 2009

Säddischung

Isch bin ja eischendlich ooch e Koch - e Hobbykoch. Das heeßd, isch koche fiehr de Familje - sonndachs. Un wenn ma Besuch komm dud - zum Beischbiel dor Brudor von meinor Gudstn mid meinor Schwäschorin - dann koch isch ooch was. Und zwar du isch was kochn, was mor dann alle zusamm essn dun. Isch koche das nisch bloß so zur Schoh - bloß ma so zum Kosdn - wie im Fernsähor. Nee, das was isch kochn due, das wird dann gegessn, bis alle sadd sinn.

Ibrischens - wenn mor Hungor had, dann dud mor was essn un is dann irschendwann sadd. Wemmor Durschd had, dann dud mor was drinkn - un was is mor eischendlich dann hinnorhähr? Nisch mähr durschdisch? Guhd, abor wie heeßd das, wemmor nisch mähr durschdisch is? Nachm Essn is mor sadd, nachm drinkn is mor... - nee, mor is doch nisch gleich jedsmal voll! Abor das bloß ma nähmbei.

Jednfalls isch koche zum Zwegge dor Säddsischung. Von Gulasch mid Gleese, ibor Schweinebradn mid Sauorgrad, bis Hiehnschn mid Reis. Guhde brolledarische Kische - kennde mor sachn. Un mir dud die Kocherei ooch Schbaß machn. Un wenn am Ende dann werglich alle rischdisch neinhaun un schmadzn dun, dann bin isch ooch e bißl schdolz off mei Werg.

Was nu de Kinnor bedreffn dud, wo die noch kleen warn un midgegessn hamm - ja, als die noch sogenannde Midessor warn... mor kann ooch Barasidn sachn! - da hadde isch nur ganz seldn ma e ungedriebdes Erfolschserlähbnis. De Kinnor haddn immor was runzumähgln - meisdens weil irschendwie e bißl Schbegg am Sauorgrad war odor am Fleesch noch e bißl was Zerrisches... odor weils iborhaud nisch rischdisch gewähsn is. Nee, Kinnor sinn fiehr een Koch e sähr undankbares

Bubligum. Du brauchsd als Koch Leide, die gerne was essn dun - dähnen Essn Schbass machn dud. Kochkunsd is bei Kinnorn wie Berl'n vor de Säue.

Abor genau so sinnlos is ja nu eischendlich die Kocherei im Fernsähör. Guhd, die Leide im Schdudio, die dann ma kosdn derfn, die dun meisdens sähr begeisdord sein ibor das, wasse kosdn derfn, abor die wern ja nisch sadd dadervon. Un die Kesche dun ja ooch nisch soviel kochn, dass werglich alle in dähm Schdudio sadd wern kenndn. Da wern zwahr de feisndn Sachn zusammengebanshd, abor nisch zum Zwegge dor Säddischung - bloß als Schoh. Un wenn de vorm Fernsähör sidzn dusd, grischsde heeschdens Abbediehd un fängsd an, ersadzweise irschendwelsche Schibbs in disch neinzumambfn odor irschendwas annersch, was dor Kiehlschrank grade vorweisin dud. Du kannsd ja das, was die dir vorkochn dun, nisch so schnell nachkochn. Un wenn die dann im Fernsähör sachn, dasses ganz leggor schmeggn dud, dann mussde das gloom. Das is wie wenn die in so Seggsfilme zeischn, wenn zwee in de Egsdahse komm. Das mussde ooch gloom. Un in beede Fälle wern deine eischnen Bedirfnisse nisch befriedischd. Du mussd irschendwie Ersadz suchn. Ehm so Schibbs odor Kähsehabbn odor de Gudste. Je nachdähm!

Eduard Sachsenmeyer